

# 老人權益中心

2006年12月19日出席立法會福利事務委員會檢討綜合社會保障援助計劃小組委員會會議

## 綜援金額唔檢討 老有所養得個講 最弊老人病痛多 飯錢唔夠貼藥錢

### 香港繁榮我有份 社會唔好無良心

我馮容今年已經 93 歲，係香港做到 82 歲(1997 年)才退休，退休後病足一年，三萬幾蚊長期服務金全部無晒至攞綜援。香港老人在退休後毫無保障，政府唔好無良心！一九四五和平後，我隻身從大陸來到香港，憑「這雙手」賺錢吃飯，做過割草、泥工、牛皮廠、打住家工，由朝做到晚，退休那年(1997 年)每月只得 3000 蚊！點養老呀？

九七之後，政府話就話「老有所養」，但綜援金由\$2550 蚊一減就減咗 300 蚊，咁點呀？人地食餸頭，自己食餸尾囉，無資格學人講營養。如果無病無痛，食少D囉；有病有痛，真係食藥多過食飯，唔係等死呀？舊年時我「生蛇」，政府醫生無用嘅，最後我睇中醫食中藥，每日\$70，醫足三個月至好番。你睇我瘦成咁，食唔捨得食，政府份綜援金扣到雞碎咁多，只係養肥你班高官，你地都唔知醜字點寫？我 93 歲啦，我希望政府即刻加番綜援金，盡快搞好「全民養老金」，等我們呢代老人可以在香港安享晚年！

### 綜援老人醫食有憂 特區高官職高薪厚

我卜就嚟在香港捱足幾十年，而家「人又老，錢又無，身體又唔好」，有嚴重的哮喘，真係「無錢食藥慘過無錢開飯」。人地話攞綜援睇醫生「唔使錢」，但佢唔知而家醫管局衰到盡，爲了慳錢，要「藥物自購」，減少分發藥物。我係長期病患者，以前醫生寫紙，每月發三枝氣管噴霧劑，而家半年只有八枝，唔夠點呀？自己慳飯錢買囉，頂唔順就惟有返急症室！

我申請過公屋，仲同房屋署講，請你考慮我係獨居嘅長期病患者，希望派間屋近些仁濟醫院，有事幹自己去急症，政府都話之你，次次派到天腳底咁遠，我咪唔要囉！而家仲住係荃灣舊區好差嘅板房，租金個個月都超過上限\$100 元，又係用飯錢貼囉！無錢就問人借住先。

我地中心嘅老人，舊年開過幾次會，計過老人的日常生活需要，每個月起碼要\$3000，完全無病無痛都最少\$2550【詳見附件一】，呢個統計，同「全民養老金」嘅爭取完全符合。你班高官月入十幾萬，一日人工係我地兩個月嘅綜援金，你係度坐足一朝，人工夠我食一個月，你班高官講說話會唔會面紅呢？我地班老人貢獻社會一生，政府唔好忘恩負義！

我們所屬的「老人權益中心」，是一個關注及爭取基層及邊緣老人權益的自助互助組織，我們一直希望以行動直接參與，影響及改善老人社會福利政策。我們重申：

- 1) 要求立刻將長者綜援金基本金額恢復至削減前水平(\$2550)，並立刻檢討現時的綜援政策；
- 2) 要求恢復與子女合住的長者，可以「獨立資格」申請領取綜援金；
- 3) 要求政府立刻推行「全民養老金」計劃，徹底解決香港的老年貧窮問題。

2006年12月19日

## 老人權益中心長者每月基本生活開支統計表（不計住屋開支）

開支項目	每日開支	每月開支	備註
衣：衣服鞋襪	<b>\$3</b>	<b>\$90</b>	
食：早餐 \$10 午餐 \$20（將自行煮食及外出吃飯平均計算） 晚餐 \$16 + 煲湯 \$4（每月4次 每次平均\$25）	<b>\$50</b>	<b>\$1500</b>	「食物」類別是絕大部長者經常壓抑的開支
水果/雜糧	<b>\$5</b>	<b>\$150</b>	
行：交通費／社交使費	<b>\$5</b>	<b>\$150</b>	
雜費：水(\$20)/電(\$80)/燃料：火水/煤氣/石油氣(\$80)	<b>\$6</b>	<b>\$180</b>	
醫：睇醫生(中/西醫)／買成藥／藥油	<b>\$15</b>	<b>\$450</b>	
雜項物品：報紙／清潔用品／個人護理用品	<b>\$5</b>	<b>\$150</b>	
雜項服務：理髮/個人護理/參與中心服務	<b>\$3.3</b>	<b>\$100</b>	
特別開支：電話費(\$110)／租平安鐘(\$100)	<b>\$7</b>	<b>\$210</b>	只有獨居綜援長者獲津貼
總開支：	<b>\$99.3</b>	<b>\$2,980</b>	